

# Ovra lirica cumpletta dad Alfons Tuor

■ (cp) **Alfons Tuor (1871–1904)** è in dals impurtants lirichers e satirichers sursilvans. Insaquantas da sias poesias – *Allas steilas, Il semnader* – appartegnan tranter ils texts rumantschs ils pli renumads e citads il pli savens. **Ussa cumpara per l'emprima giada sia cumpletta ovra lirica.** Dapi l'edizium parziala *Steilas* (1954) da Gion Deplazes èn las poesias dad Alfons Tuor mai pli vegnidas edidas. Cuntrari ad auters poets sursilvans sco Giacun Hasper Muoth, Gian Fontana e Gion Cadieli è quai impurtant corpus da poesias sursilvan oz pia strusch pli accessibel a lecturas e lecturs interessads. Il romanist *Renzo Caduff* è sa deditgà en sia lavur da retschertga e studi a l'ovra dad Alfons Tuor. Per l'emprima giada po ussa vegnir publitgada l'edizium cumpletta da sias poesias.

La finamira da questa edizium è da pussè metter a disposiziun l'entira ovra poetica dad Alfons Tuor sco ella è vegnida scritta e publitgada a sias uras da l'autur. Sper las ediziuns d'autur vegnan era diversas poesias manuscrittas ord ses relasch publitgadas, intginas da quellas per l'emprima giada.

Da la bell'entschatta èsi stà l'idea da far in'edizium legibla ed accessibla ad in public betg spezialisà e perquai publitgar poesias e commentari en il medem cudesch. Sco agid a lecturas e lecturs è plinavant vegnì agiuntà in glossari per plets vegnids ord moda e betg uschè frequents mintgamai gest sper il text correspundent. Plinavant cuntogna quest cudesch ina nova biografia da l'autur, accompagnada da diversas fotografias ed illustraziuns or dal relasch.

«Nos poets classics, in da quels ei Alfons Tuor, van plaunsiu en emblidanza e cun els lur ovras. Perquei eis ei impurtont ch'els vegnien puspei reedi e legi, il pli grond monument ch'ins sa far ad in poet ed a si'ovra. Renzo Caduff discuviera en siu grondius cudisch cun poesia, com-



## Alfons Tuor Poesias

**Il frontispizi dal cudesch cun las poesias dad Alfons Tuor** MAD

mentari e fotografia in niev Alfons Tuor che nus enconuschevan strusch aschia. Quella nova edizium cumpleta dallas poesias ei indispensabla. Sco vischin da Rabius selegrel jeu nundetg da quei cudisch.»

*Leo Tuor*

### Vernissascha cun accompagnament dal Chor mischedau Rabius

La vernissascha è dumengia, ils 15 da november 2015 en la sala dal hotel Greina a Rabius a las 16.00. Il Chor mischedau Rabius embellescha questa preschenta-

ziun cun diversas chanzuns. Leo Tuor e Renzo Caduff explitgeschan l'impurtanza da l'ovra dad Alfons Tuor. *Otmar Seiler* moderescha questa occurrenza. L'entrada è libra. Silsunter datti in pitschen aperitiv.

**Ulteriuras preschentaziuns: ils 28 da schaner 2016 en la Biblioteca chantunala a Cuira a las 18.00. Ils 15 da mars 2016 al colloqui rumantsch da l'Universitad da Turitg, edifiz principal, a las 18.15.**

**Il cudesch custa 42 francs e po vegnir retratg en las librarías e sut [www.chasaeditura.ch](http://www.chasaeditura.ch).**